

Akilerartarnermut Oqartussaasut ataanni immikkoortorta qarfimmik immikkut suliaqartussamik, aningaasaqarnikkut pinerluuteqartarnerup, ilaatigut ikiaroonartunik niuerniartarnermut attuumassuteqartup, paasineqarnissaanik siunertaqartussamik pilersitseqqullugit Naalakkersuisut peqquneqarnissaannik siunnersuut. Tamanna pissaaq akileraarusersuinermi annertunerusumik suliniuteqarneq aqutugalugu, tamatumunnga ilanngullugit nalunaarsuiffiit atortorissaarutillu pioreersut ataatsimoortinnerat, tassuunakkut isertitat pigisallu nalillit inatsisinik unioqqutitsilluni pissarsiaasimasut paasineqarsinnaaqqullugit.

(Inatsisartunut ilaasortaq Agathe Fontain, Inuit Ataqatigiit)

Akissuteqaat

(Aningaasaqarnermut Aatsitassanullu Naalakkersuisoq)

Siullermeerneqarnera

Inatsisartunut ilaasortap Agathe Fontainip, Inuit Ataqatigiit, saqqummiuppaa Akilerartarnermut Oqartussaasut ataanni immikkoortorta qarfimmik immikkut suliaqartussamik, aningaasaqarnikkut pinerluuteqartarnerup, ilaatigut ikiaroonartunik niuerniartarnermut attuumassuteqartup, paasineqarnissaanik siunertaqartussamik pilersitseqqullugit Naalakkersuisut peqquneqarnissaannik siunnersuut. Ilaasortap tamatumunnga aaqqiissutissat ilaattut siunnersuutigaa tamanna pissasoq nalunaarsuiffiit atortorissaarutillu pioreersut ataatsimoortinnerisigut kiisalu immikkoortorta qarfimmik immikkut suliaqartussamik pilersitsinikkut.

Akilerartarnermut Aqutsisoqarfiup akileraarusiilluni sulinermini paasisutissat, nalunaarsuiffiit sulianullu atortorissaarutit assigiinngitsut aqutugalugit pissarsiarisinnaareerpai, soorluttaaq isumaqartoqartoq sulianut atortorissaarutunik ataatsimut suleqatigiissitsineq inatsisitigut tunngavissat pioreersut periarfississutaasa iluanni pinnaareersoq. Taamaammatt Naalakkersuisut isumaqarput aporfiit anginersaat tassaniinngitsut.

Inuit Nunatsinni najugaqartut tamarmik nammineerluni nalunaarsuiffimmik tunngaviatigut tunniussisussaataapput, tassani nalunaarsorneqassallutik ukiumi aningaasarsiat kiisalu aningaasartuutit ilanngaatigiumasat, pigisalli naatsorsorneqarfiannik suliaqartussaataatanatik, taamaammallu inuit ataasiakkaat sunik pigisaqarnerannut tunngasut Akilerartarnermut Aqutsisoqarfiup nalunaarsugaatiginngilai. Taamaaliortoqassappat inatsisinik allannguisoqartariaqassaaq.

Kiisalu oqaatigisariaqarpoq inuit inertequtaasunik suliaqarnermikkut annertuumik aningaasarsiallit aningaasaatitik akilerartarnermut oqartussaasunut nalunaarutigisarunanngimmatigit. Soorluttaaq taasariaqartoq qularutissaanngimmat anngiortumik suliallit ittannerunerpaat pigisatik pisortat oqartussaasut paasisassarinnngisaannut

inissittarsimassagaat, immaqaluunniit katissimallugit aapparissamik aqqi atorlugit, imaluunniit aningaasat sulianut inerteqqutaanngitsunut taputartuullugit toqqorternerisigut.

Akilerartarnermut Aqutsisoqarfiup politiinik suleqateqarnera pitsaalluinnartuuvoq, arlaleriarluni politiit aningaasaqarnermut tunngasut pillugit paasissutissanik tuniorneqartarput, aningaasaqarnermulluunniit tunngasunik pissarsiniarneranni ikiorneqartarsimallutik.

Akilerartarnermut Aqutsisoqarfiup politimestereqarfik akuttunngitsumik ataatsimeeqatigisarpaa, soorlu aamma politiini Akilerartarnermullu Aqutsisoqarfimmi sulisut ilaatigut paasissutissanik paarlaateqatigiinnissaq siunertaralugu naapittartut. Akilerartarnermut Aqutsisoqarfik isumaqarpoq tamanna suleqatigiinnermut annertusaataasimasoq aammalu oqartussaasut suleqatigiinnerisigut suliat amerlanerunerannut pissutaaqataasimasoq.

Akilerartarnermut Aqutsisoqarfiup suliat politiinut ikiuuffigisimasamik amerlassusiat immikkut naatsorsuuteqartinngilaa, ukiunili kingullerni marlussunni suliasani 20-30-ni ikiuussimanissartik eqqoriarlugu, maannakkullu suliasani qulit missingini politiinut ikiuullutik.

Taamaammat aningaasaqarnikkut pinerluutit paasineqarnissaat siunertaralugu immikkoortortaqqarfimmik pilersitsinissaq, suliat akilerartarnermik aqqissuussinermi nalinginnaasumi politiinillu suleqateqarluni ingerlanneqartut amerlassusiat eqqarsaatigalugu pisariaqartutut isigineqanngilaq. Ajornartorsiut Akilerartarnermut Aqutsisoqarfiup Nunatsinnilu Politiit immikkut eqqumaffigilluinnareerpaat.

Akilerartarnermut Aqutsisoqarfik ikiuinissamik politiinit qinnuigineqaraangat tamakku piaartumik ullullu arlaqanngitsut ingerlaneranni akineqarnissaat isumaginiarneqartarpoq, suliasammi taamaattut ilungersunarluinnartutut isigineqartarmata. Taamaattumik Naalackersuisut isumaqarput immikkoortortaqqarfik immikkut sulialik tassannga sukkanerusumik suleriarsinnaanavianngitsoq.

Aammattaaq oqaatigineqarsinnaavoq ikiaroorntartut aqqutigalugit allatullu anngiortumik aningaasarsiorniarluni pinerlunnernik akiuiniarluni sulineq akilerartarnermut oqartussat suliasarinngimmassuk politiilli suliasaralugu. Suliat qulaani taaneqartut ilaanni inuit pineqartut hashimik tuniniaasimanerminnik nassueruteqaraangata suliaq akilerartarnermut oqartussasunit iperarneqartarpoq, anngiortumimmi tuniniaanikkut isertitat akileraaruteqaataasussaanngitlat.

Akilerartarnermut oqartussaasut pingaarnertut suliasaraat inuit ataasiakkaat suliffeqarfiillu aningaasarsiaminnik aningaasartuutiminnillu eqqortumik nalunaaruteqarnissaannik qulaakkeerinissaq, kiisalu taakku tunngavigalugit inatsisit atuuttut naapertorlugit akileraarutissat eqqortumik naatsorsorneqarnissaannik, minnerunngitsumillu akilerneqarnissaannik qulakkeerinissaq.

Taamaattumik Naalackersuisut isumaqarput aningaasarsiornikkut pinerlunniarnermik akiuiniarluni immikkoortortaqqarfimmik immikkut suliaqartussamik pilersitsinissamut aningaasartuutaasussat taassuma sulineratigut angusarineqarumaartussanut naapertuunnavianngitsoq.

Siunnersuutip tapersorsorneqarnissaa Naalakkersuisut qulaani taaneqartut tunngavigalugit inassutigisinnaangilaat.